perchè, non havendo danari, haveano messo a saco certo pan; et zonti, il capitanio si dolse assai che la Signoria non mandava danari per pagar questi fanti, dicendo fanno mal, e mi convien punirli et non sono pagati. Poi si dolse non si meteva in ordene l'exercito et il Re veniva, e li havemo scrito aremo tanta zente et ne havemo a gran zonta. Item, manda letere aute da Spadazin, qual serive, eri matina, Zuoba, a hore 18, il signor Renzo capitanio di le fantarie fece brusar la mità dil ponte di Lignago et il ponte portato con si su le burchiele mia 5 di soto più verso la Badia fo fato, et pasavano tutavia l'Adexe, e la scorta andata era con lui; il qual ponte si fa in uno loco ditto . . . , et paserano l'Adexe . . . Item, essi procuratori si doleno che dito capitanio non habbi voluto menar con si li fanti con dir non li tegneriano driedo, perchè havendoli, de facili si hariano scontrati in el vicerè, ch'è andato di Verona a Brexa, poi a Cassano.

Di campo, dil provedador zeneral, da le Brentele, di eri sera. Come havia aviso eri zonse il vicerè a Verona con 150 homeni d'arme, 200 cavali lizieri et 500 fanti alemani, qual va verso Cassan per esser lì a parlamento con il ducha di Milan, e terminar quello habino a far contra Franza, che vien in Italia. Item, scrive si mandi danari; et cussi scrive il capitanio zeneral. Item, mandano alcune letere intercepte per nostri, quale l'Imperador mandano in campo a Vicenza al vicerè e a' soi cesarei oratori.

220 Di l'Imperador aduncha fo leto letere drizate, ut supra, di 25, da Bles in Alemagna, apresso..; et etiam scrive Achiles Boromeo; et di l'orator yspano è a la corte di Soa Maestà, in conformità. Come li piace habino fati ritornar li fanti alemani che partivano di campo, et che li danari non è possibele a mandarne, ma de qui si fazi ogni provision per averne per pagar le sente. Et l'orator yspano scrive quella Maestà è su gran spesa, e liconvien pagar le spexe à fato il re di Hongaria e di Polana per la venuta loro a Posonia, dove è seguito le noze fate etc., e altre particularità scrive; le qual letere fortasse saranno qui sotto.

Da poi disnar, fo Pregadi per lezer letere: è molti zorni non è stato; et vene le infrascrite letere di Hongaria, qual fo lecte.

Di Hongaria, di l'orator nostro, di 17, 18 et 22, da Buda. Come il Re è pur a Posonia; le noze l'Imperador mandò a ratificarle, et uno Hironimo Azalin veneto vi andò orator a Soa Cesarea Maestà a questo effecto; il qual Imperador si aspe-

tava a Posonia, et vien per aqua. Ha zà mandato do pezi di artelarie era a Uspurch. Item, è nova polani aver dato un'altra gran rota a' moscoviti che li infestavano. Il qual Re è pur a Posonia, dove etiam dito orator nostro tien il suo secretario. Item, scrive in dite letere come turchi erano a campo a Jayza, ch'è sora il Danubio in la Croatia, terra di passo e di grande importantia; et per l'ultima di 21, scrive turchi haverla auta per forza. Item, ch'el vayvoda transilvano, qual è a quelli confini con persone 8000, à mandato a dir al re di Hongaria che chi prima verà in campagna da lui, o l'exercito di Sua Maestà, o quello dil Turco, a quello se aderirà; per il che l'Hongaria è in gran garbuio, e voleno far exercito contra turchi, et voria la Signoria li sovenisse di danari. Et come li ha ditto uno, che havendo dito al Re l'ultimo orator fo qui, che la Signoria haveria a piacer di uno orator restasse fermo a Venezia, par, quel domino Filippo More, stato altre volte orator, desidera ritornar, e si tien ritornerà etc. Item, scrive uno aviso, par il Turco habbi fato paxe con li signori di Oriente, zoè el Sophì, et de facili torà l'impresa contra hongari.

Di Candia, di rectori, fo leto le letere, di 12 220 * Mazo. Zerca galie; hanno armate 4, ne armerano le altre do; è zonte le do galie venute a disarmar. Item, zerca lassiti hanno posto a l'incanto. Si diceva si haria ducati 10 milia; non si trarà 3000.

Di Corphù, di sier Vicenzo Capello provedador di l'armada, Zugno. De occurrentiis, et galie è fuora; è cosse de li, nulla da conto.

Di sier Zuan Nadal Salamon synico, date a Corphù, do letere. Lauda sier Alvise d'Armer baylo e li consieri, ma à trovato quel Hironimo . . . soprastante a li biscoti, qual à robato molti biscoti di raxon di la Signoria nostra. L'hà fato retenir, et fa il processo; ma tien non haverà da pagar tanta quantità; et altre particularità.

Di Roma e Franza fo leto le letere, ma in una è uno capitolo di una letera manda Costanzo a Gasparo la di Vedoa secretario nostro, da Lion, di 25, tamen non fu leta, perchè fo leta in Consejo di X.

Di Ingaltera, di sier Andrea Badoer e sier Sebastian Justinian el cavalier, oratori nostri, di 16 Mazo. Come era stà fato le noze di la sorela dil Re in quel ducha di Sofolch, molto ferialmente e senza pompa. Item, non se intende de li impresa alcuna vol far il Christianissimo Re.

Di Padoa, fo letere, di ozi, hore 15, con avi-